

01

春游诗

藜兰已飞蝶，杨柳半藏鸦。

物色相煎荡，微步出东家。

既同翡翠翼，复如桃李花。

欲以千金笑，迴君流水车。

02

闺情诗

月出宵将半，星流晓未央。

空闺易成响，虚室自生光。

娇羞悦人梦，犹言君在傍。

03

望夕霁诗

连山卷乱云，长林息众籁。

密树含绿滋，遥峰凝翠霭。

石溜正潏潏，山泉始澄汰。

物华方入赏，歧予心期会。

04

东南射山诗

还丹改容质，握髓驻流年。口含千里雾，掌流五色烟。
琼浆泛金鼎，瑶池溉玉田。倏忽整龙驾，相遇凤台前。

05

苦暑诗

日坂散朱雾，天隅敛青霭。飞飙焕南陆，炎津通北濑。
繁星聚若珠，密云屯似盖。月至每开襟，风过时解带。

06

春月二首。其二

菘菘心未发，靡芜叶欲齐。
春蚕方曳绪，新燕正衔泥。
野雉呼雌雉，庭禽挟子棲。
从君客梁后，方昼掩春闺。

山川隔道里，芳草徒萋萋。

07

北寺寅上人房望远岫翫前池诗

安期逐长往，交甫称高让。远迹入沧溟，轻举驰昆阆。

良由心独善，兼且情由放。岂若寻幽栖，即目穷清旷。

激水周堂下，屯云塞檐向。闲牖听奔涛，开窗延叠嶂。

前阶复虚浴，洊迤成洲涨。雨点散圆文，风生起斜浪。

游鳞互瀟灏，群飞皆唳吭。莲叶蔓田田，菱花动摇漾。

浮光曜庭庑，流芳袭帷帐。匡坐足忘怀，讵思江海上。

08

以服散鎗赠殷君别诗

玉铉布交文，金丹焕仙骨。

九沸翻成缓，七转良为切。

执以代疏麻，长贻故人别。